

DE VIIS EX INTESTINIS AD
SYSTEMA UROPOETICUM.

DISSERTATIO INAUGURALIS PHYSIOLOGICA,

QUAM,

CONSENSU AMPLISSIMI MEDICORUM
ORDINIS

IN

UNIVERSITATE CAESAREA LITERARUM
DORPATENSI;

PRO GRADU

DOCTORIS MEDICINAE

RITE IMPETRANDO,

LOCO CONSUETO

PUBLICE DEFENDET

AUCTOR

JOANNES GUSTAVUS LINDGREN,
LIVONUS.

DORPATI LIVONORUM

EX OFFICINA ACADEMICA J. C. SCHÜNMANNI
MDCCXXIV:



I m p r i m a t u r,
ea tamen conditione, ut, simulac typis excusa fuerit
dissertatio, septem exemplaria collegio, cui librorum
censura mandata est, tradantur.

Dorpati Livonor, calend. Novembr.

MDCCXXIV.

Fr. Parrot, b. t. Decanus.

16282

I n t r o i t u s.

§. 1.

Quemadmodum virium chemicarum atque physicarum in se invicem molitione multifarias formationes in omni anorganicarum rerum natura oriri atque iterum collabi nobis constat; ita ad organismi oeconomiam explicandam leges physicae atque chemicae sufficere deberent, et maxima saltem sic dictae physiologiae pars solius chemiae et physics applicatae nuncuparetur nomine, nisi utraque haec disciplina, etsi quam maxime novissimis temporibus progressa, manca tamen, mi-

nusque perfecta appareret, quam quae tantam nobis foeneraret lucem. Ne ipsi quidem geologiae operam navantes, quippe qui causas formationum omnium nonnisi ab his duabus doctrinis repetere possint, hoc impetratum abstulerunt, quod illustrarent, quomodo fossile quoddam transmutari possit in alterum, cuius chemica quidem analysis nova omnino elementa detexit, quae fossili primario plane non inerant. Leges itaque indagantes, quibus vita adstricta est, omnia ejus phaenomena, quae hucusque nec physica, neque chemica ratione explicari licuit, vi cuidam vitali, seu incitabilitati adscribimus. Multum tamen abest, ut hac organismi facultate, quam nunc vocare debemus, omnia illustrare valeamus, ut potius vel plurima nos penitus latere debeant. Quae praeципue de secretione valere nemo inficiabitur, ubi maxima quidem chemica actio perspicua, nobis tamen causarum ejusdem plane inscis, nisi incitabilitatis ope eam sufficienter illustrandam esse, inepte suspicamur.

Sic etiam, qua ratione urina gignatur, quamdiu nec chemia s. d. organica perfectior reddit, nec conditiones detectae fuerint chemicae, quibus

humores subjiciantnr, ut urina ex iis secedat, maxima erit obrutum caligine.

§. 2.

Quae cum ita sese habeant, nobis urinae secretionem perscrutantibus, nihil omnino aliud reliquum est, nisi quod illius gravissimae functionis organon, viasque investigemus, quibus subministrentur fluida, lotio componendo inseruentia.

Sunt autem in regione utraque umbilicali extra peritoneum sita duo praecipue viscera, in quibus primum deprehendimus urinae vestigium, unde haec per ureteres in vesicam detrusa, ibique accumulata, per urethram tandem eliminatur. Mittamus artificiosissimam rerum structuram, ceterarumque systematis uropoëtici partium, in anatomies libris jam satis optimeque descriptam; inquiramus potius, quod magis nostro congruit scopo, quibusnam viis huic systemati advehantur humores. Nullae autem aliae viae plerisque celeberrimis viris, anatomies studium amplectentibus, sunt visae, nisi arteriae primum renales, quae quartam fere aut sextam saltem sanguinis

pàrtēm, Senaco auctore, renibus largiuntur, ex qua lotium efficiatur. In piscibus autem, reptiliis, avibusque, quod memoratu dignissimum, altera venosi sanguinis pars, e posteriori corporis parte revertentis, renes intrat, secretioni urinae fortasse inserviens; alterà, quae in hepar effunditur, ad bilis confectionem faciente.¹⁾

Neque reticendae sunt praeter renalem, aliae etiam arteriae, quae quidem, ut umbilicalis, nutritione organorum urinae se- et excretioni spectantium, funguntur, tamen etiam velut viae, quibus humores lotio advehantur, habendae sunt, nam e sanguine arterioso mucus halitusque secedit serosus, quicum lotium conjungitur. Evidem enim mihi persuasum habeo, et membranas mucosas, cutis ad instar, aquosum exhalare vaporem,

§. 3.

Praeter has fluidorum ad systema uropoëticum vias ab incunabulis inde medicinae celebrimi atque peritissimi ad nostra usque tempora medici, phaenomenis infra enumerandis inducti,

¹⁾ Meckel's Archiv für Physiologie. Bd. 3. S. 147.

alias adesse crediderunt, quibus et fluida et solida e ventriculo ductuque intestinali in renes aut vesicam urinariam recta veherentur, atque easdem, cum culter anatomicus nondum detegere potuerit, clandestinorum lotii trahitn insignierunt nomine. Quam vero significationem minus apte electam esse, quisque videbit perpendens, illis viis, si revera adsint, neutquam lotium jamjam elaboratum, sed fluida tantum, aut, ut dicunt, solida, ductu intestinali forte contenta, ad vesicam aut renes posse afferri, ubi urinae demum admisceantur, — nisi renum omnino functione negetur.

Utrum has secundas sic dictas lotii vias agnoscit oporteat, an phaenomena, quae pro illarum praesentia certent, ad primarias vias, quibus fluida lotio effingendo praebentur, referenda, an alio quodam modo illustranda sint, — nunc quantum valeam pro angustiae temporis atque virium meorum modulo, mihi perscrutandum sumam. Quae ut rite persequar ita tractanda mihi esse duco, ut primum phaenomena atque argumenta enumerem, quae tales vias occultas omnino adesse probare medicis visa sint, tum hasce ipsas a physiologic

in scenam prolatas describam, et in postrema denique hujus speciminis parte afferam, quomodo illarum ope nondum patesfacta illo per vasa sanguinea humorum tramite in auxilium vocato, illustrari videantur.

Sectio I.

§. 4.

Adsunt, ut attuli, permulta phaenomena, quibus jam pristinis temporibus ad recentiora usque medici animum induxerint, ut tramites recta & ductu cibario ad sistema uropoëticum praesertim ad vesicam tendentes peculiares adesse suspicarentur, iisque in corpore ipso demonstrandis studerent. Neque desunt alii auctores, qui eosdem, quamquam detegere non potuerint, nihilo secius omnino non denegandos esse institutis experimentis probare tentaverint.

§. 5.

Phaenomena illa enumerantes primum ea afferre incipiamus, quae saepissime nobis occurrant. Potulentis largiter assumptis, praesertim cum nimia corporis agitatio antecesserat, brevi post de lotii excretione monemur, qua non solum urina copiosa sed etiam odore coloreque pótus ingesti, imo etiam omnibus interdum facultatibus ejusdem imbuta redditur. Sic perill. Haller 1) hominem quandam, thermis Weissenbürgensibus sumptis uncias centum et quinquaginta excernentem vidit, nec non cel. Proust 2) potulenta acido carbonico praegnantia urinam reddidisse spumosam affirmat. Scriptis ceterum medicorum multa alia exstant exempla, quibus substantias et odore peculiari praecellentes, et salinas ingestas in lotio paulo post excreto repertas esse probantur, quae si non plane se integras, tamen nonnullis signis exhibuerint. Allium, asparagus, fraga, tamarindi, pyrola umbellata, viola tricolor, cortices aromatici, praesertim cortex cinamomi, ol. tereb., balsamica

atque resinosa, ore assumpta, urinae singularem tribuunt odorem, itaque aliqua saltē ex parte in illam abeunt. Beta rubra, rheum, succus opuntiae et alia colore rubrum eidem impertinent, in qua etiam kali boruss., nitrum, acid. citricum, malicum etc. brevi antea sumpta detecta sunt. In eorum hominum lotio, qui tota fere aestate non nisi solani lycopersici fructibus, magna acidī malici atque oxalici copia praeditis, vescuntur, haec acida post coenam inveniri, juscumque gallinaceis aut bubulis majori quantitate assumptis urinam extractum aromaticum carnis (osmazom Thénardi) redolere, D. Morichini 1) asserit. Pari modo decocta seminum, altheae, malvarum etc. mucilagine abundantia facile in urinam transeunt, quae affectiones inflammatorias aut spasticas, quibus organon uropoëticum quoddam laboret, quam maxime mitigare valeant. Cuivis denique in semet ipso observandi occasio offertur, sese cum magnā aquae praincipue frigidae copiam biberit, brevissimo tempore post, imo etiam inter bibendum ad urinam excernendam impelli, eandemque et pallidam,

1) Boerhavii paelection. Tom. I. p. 297.

2) Meckels Archiv für die Physiologie. Bd. 2, S. 467.

1) ibid.

et copiosissimam postea reddi. Celeritas itaque, qua substantiae in lotium transeunt, earumque integritas primum vias clandestinas comprobare videntur.

§. 6.

Exstant porro quaedam exempla, quae et renum cum ureteribus commercio ex morbo quodam nisus formativi plane interrupto et renibus utique destructis, aut nullis, lotium tamen redditum esse docent. Sic Thilow 1) in fele, quae sicut aliae minixerat, ureteres invenit multis cum radiculis in mesenterii latere exorientes, neque conjunctos cum renibus, carnosam praese ferentibus indolem. Nonnulli autores renes scirrhosos, penitus suppuratos aut alio modo degeneratos invenerunt, urinae tamen se - et excretionem vita durante haud laesam fuisse affirmant, quod idem accidisse dicitur homini, renibus omnino carenti 2). In quoque vero hujusmodi casu cel. Autenrieth simul sudores urinam redolentes, vomitum aut diarrhoeam urinosam affluisse monet.

1) Anatomia pathol. pag. 6.

2) Autenrieth Physiol. §. 803.

§. 7.

Nounilli etiam corpora solida, ore accepta in vesica iterum reperta aut sintul cum lotio excreta esse afferunt, quippe quae nullo alio modo, nisi per illas vias huc pervenire possint. Cuiusmodi corpora, ut aliqua tantum ex multis illis, quorum cel. Haller 1) et alii mentionem fecerunt, exhibeam, Plutarchus 2) hordei spicas, parvum clavum ferreum Hesse 3), alijs vitri frustum, osicula alijs, alijs acus ex improviso deglutitas atque pilos in vesicam descendisse observarunt.

§. 8.

Phaenomenis, quae experientia ad vias lotii occultas probandas nobis praebuit, enumeratis, nunc experimenta, ab auctoribus quibusdam instituta explicanda aggrediar, quibus illas licet non apertas, tamen non esse denegandas, argumentari conati sunt. Morgan, Kratzenstein 4), Brun-

1) Elementa physiol. Tom. VII. pag. 275.

2) Symposium. I. VIII. probl. 9.

3) Hist. rarior. med. cas. 1.

4) Theoria flux. diab. pag. 124.

ning 1) ureteribus filo constrictis tamen lotium in vesica deprehendisse contendunt. Er. Darwin, cum potum, quem dicunt Punsch, cuidam drachmis duabus nitri commixtum propinaret, salis vestigia in lotio, nulla autem in sanguine e vena brachii misso reperit. Wallaston 2), decem granis kali borussici a quodam sumptis, duabus horis praeterlapsis caeruleo colore urinam, ferro adhibito, tintam observavit, nec in sero sanguinis, venaesectione in brachio missi, kali borussicum detegere potuit. Marcet 3) foeminae, diabete laboranti, intra octo horas gr. XL ejusdem salis praebuit, quod mox urinae impertitum, neutiquam tamen in sero deprehendebat, vesicatorii ope sub epidermide accumulato. D. Morichini 4) vias clandestinas adesse probabile reddere studens, matutino tempore potum e succo citri espresso paratum biberat, atque in lotio suo tantummodo

1) Dissert. de singult exp. 13.

2) Meckel's deutsches Archiv für die Physiologie. Bd. 1, pag. 676.

3) ibid.

4) loco cit.

acidum citricum, malicum atque paululum natri muriatici, in ductu intestinali semper scilicet obvii, nulla autem aliorum urinae peculiarium salium, nec acidi phosphorici, nec urici vestigia invenit. Ulterius idem affert, sero sanguinis natron liberum contentum esse, quocum illa acida, quae in lotio detexisset, sese conjungere deberent, nisi viae peculiares adessent, illis suscipiens et ad vesicam vehendis paratae. Qualès denique praeter vasa sanguifera esse, cel. G. M. Trevirano 1) concludendum videtur ex eo, quod cel. Home observaverit, XVII minutis horae primis praeterlapsis tinturam rhei haustam in lotio apparere, horis nonnullis post evanescere atque sex vel septem peractis, cum jam alvi dejectiones a rheo tintiae redderentur, denuo in urina sese manifestare. Brevi itaque via et eadem peculiari illam rhei copiam primam ad sistema uropoëticum esse devectam, secundam vero per vasa sanguifera, celeberrimus ille argumentatur.

1) Biologie oder Philosophie der lebenden Natur für Naturforscher und Aerzte. Bd. 4. pag. 519. Göttingen, 1814.

Sectio II.

§. 9.

Tramitum ipsorum ad sistema uropoëticum, praeter vasa sanguifera, physiologorum quidem sententia patolorum, quibus substantiae, ductus cibario contentae, excipi possint, tria omnino genera proferam mihi liceat, quo simplicior eorum reddatur conspectus. Alii enim organis, non nisi ab ipsis in corpore visis, iis alii, quae certe adesse nemo negabit, alii denique poris anorganicis, qui num re vera adsint, nec ne hucusque certantur, officium tribuerunt, humores ad vesicam aut renes reprehendi. Quorum quaeque specialiam per lustrans, quid de iis judicandum videatur, simili in medium proferam.

§. 10.

I. Ductuum peculiarium, qui tractum intestinalem cum uropoëseos organis immediate connectere dicuntur, neque tamen ab illis, nisi forte ab iis, qui eos in scenam protulerint, visi sunt, est magna varietas. Jam Hippocrates 1) sententiam fovuit, ex ventriculo fibras ad vesicam tensas esse, per quas humidum percolaretur. Morgan, Hartsoeker 2), Barchhusen 3) meatus obscuros afferunt, ab intestinis et ventriculo inde ad vesicam usque tendentes, et T. Andreae 4) hos ductus ad vesicam in talpa et cane se vidisse putabat, sicut in homine Petr. Albrecht meatum ex intestino coeco ad vesicam vergentem. Alii denique ad renes ex intestinis ductulos provenire censuerunt. Cum vero omnes haece viae utique oculos fugiant, easdem non statuendas esse, non nemo non dubitet.

1) De locis in homine.

2) Suite des conjectures physiq. pag. 79.

3) De ortu ac progressu medic. pag. 64.

4) Halleri elementa phys. Tom. VI. pag. 380.

§. II.

2. Nonnulli autores quibusdam organis, de quorum quidem praesentia nemo versatur in dubiis, ex intestinis ad renes aut vesicam fluida traducendi functionem assignaverunt. Ex ventriculo omenti auxilio Volkammer ad vesicam, ad renes Winslow per saccum, secundum vertebrae regnantem et sub ventriculo terminatum, derivari fluida posse credebant, quibus cel. Haller 1) recte objicit: „Praeterea qui de viis illis ex ventriculo „ad vesicam ducentibus scripsérunt, non satis memores fuerunt, peritonaeum continendae aquae „adeo aptum vesicam inter et abdominis cavum „poni et omne commercium intercipere. Saccus „ille Winslowianus brevis est et coeca plica.“

Niloë et Beudt renes succenturiatos eos esse autumant, per quos ad renes via pateat humidis intestinorum, per vasa lymphatica allatis, subinde percolatione quadam ad renum superficiem ex alterius sententia, alterius vero ductuum peculia-
rium ope procedentibus. Nulla autem ventriculi vasa lymphatica renes succenturiatos accedunt,

1) Elementa physiol. Tom. VII. p. 277.

quorum omnia cum illis hepatis conjuncta ad ductum thoracicum tendunt, neque peculiares glandularum suprarenalium meatus, renibus inserti, hucusque ab alio quodam inventi sunt. Ceterum renes succenturiati munere funguntur, nobis adhuc plane incognito, nisi cel. Tiedemann et Gmelin 1), ab iis e sanguine arterioso laticem secerni, qui humor lymphatico majorem assimilationis gradum impertiret, probabiliter conjecterint.

Er. Darwin 2) porro statuens, fluida surculis vasorum lymphaticorum ex intestinis sorpta, per ramos vehi ad truncos, ex his vero retrorsum ad ramos vesicaeque surculos lymphaticos procedere motu perverso, ut urinae immisceantur, sententiam protulit aequa perversam. Licet non plane pateat, cur per consensum aucta, ut affert, vasorum acutitate motus contrarius omnino possit ori-ri, hoc tamen concesso idem de vasis valere lymphaticis probare conanti permulti scrupuli et momenti quidem quam maximi objici possunt. Mo-

1) Versuche über die Wege auf welchen Substanzen aus dem Magen und Darmkanal ins Blut gelangen. S. 118.

2) Zoonomia, Lond. 1799. Vol. I. pag. 289.

tum illum perversum, cum in vesicae vasis lymphaticis adsit, in ceteris non oriri, maximo cum damno oeconomiae? Valvulae ut nullo essent obstatu? Quomodo vasa lymphatica simul et auferre et advehere possunt humores? 1) — Tum cel. G. R. Treviranus 2) telam cellulosam in regione lumbali ventriculum inter et ureteres vesicamque humores ex illo huc vehere statuit. Sed experimenta quaedam, a celeb. Tiedemann et Gmelin instituta, et Darwini et Trevirani sententiam luculenter refellunt. In equi vesica, cui tincturam iudici praebuerant, urinam quidem quam maxime, neque vero lympham in plexibus lymphaticis ventriculi, intestinorum, renum vesicaeque obviam, neque telae illius cellulosae succum colore coeruleo imbutum invenerunt, etsi magna tincturae copia adhuc in intestinis versabatur. Sic equi alius 3), qui gummi guttae et spiritum tere-

binthinae sumpserat, lotium solito magis flavum atque violam redolens ab iisdem viris repertum est, vasis lymphaticis tamen lucidam atque inodoram continentibus lympham, telaque cellulosam neque colore, nec odore peculiari praeditam. — Huc denique pertinent Bartholini 1) atque Pecqueti sententia, ex receptaculo chyli ad renes citissime liquores transferri per ductus vasis lymphaticis simillimos, qui vero certe nihil sunt nisi vasa lymphatica ipsa, ex renum vasis lymphaticis orta atque receptaculum versus tendentia.

§. 12.

3. Compluribus denique pori intestinorum atque vesicae optimi visi sunt tramites, qua celeriter salvaque integritate ex intestinis ad vesicam migrare possint substantiae, etsi qua ratione hoc fiat, inter se magnopere dissentiant.

Porositatem pristinis jam temporibus Asclepiades velut humorum viam foynisse videtur, de quo scilicet cel. Galenus 2) „Βούλεται γαρ“ inquit,

1) Esame della doctrina di Darwin sul moto retrogrado dei liquidi nei vasi linfatici. Memorium di Giuseppe Jacopi. Pavia 1804.

2) Biologia. Tom. IV. pag. 516.

3) I. e. Versuch 11.

4) ibid. Versuch 13.

1) de lacteis thorac. cap. 6 et 9.

2) Κλαυδίου Γαληνοῦ ἀπαντά ed. Kühne Lipsiae 1821. Tom. II. pag. 38.

, εἰσ ἀτμῶν ἀναλυόμενον τὸ πινόμενον υγρὸν εἰς τὴν κύστιν διαβίδοσθαι, κόπτειν ἐξ ἔκεινων αὐθίς ἀλλήλοις συνιόντων, ἀπολαμβάνειν οὕτως αὐτὸ τὴν ἀρχαῖαν ἴδιαν, καὶ γλυκεσθαι πάλιν υγρὸν ἐξ ἀτμῶν ἀτεχνῶς¹⁾, quam Asclepiadis sententiam certe respicientes nonnulli recentiores, ut Fantonus 1), Berger 2) etc. potum in vapores attolli et per poros in vesicam transmitti, denuo in medium protulerunt. Quae vero jām obiter contemplantes, neutiquam ad rem explicandam sufficere persuasum habemus; neque enim temperies in ventriculo adeo aucta est, ut potus quisque celeriter in vapores possit mutari, nec in vesica tam imminuta, ut illi condensentur, prioremque recipiant formam, neque si adsunt, cur in solam vesicam sese conferant, patet.

Pergamus ad illos, qui ratione utique mechanica humorum per poros transitum efficere studabant, neque nos fugiet, et eos in magnos incidisse errores. Aquam calidam in ventriculum aut

1) *Anatomia corporis humani*. August. Taurinor. P. I.
pag. 140.

2) *Physiologia medic.* Wittenb. 1701. pag. 198.

intestinum quoddam orificiis revinctis injectam, undiquaque transudare et exilire guttatum experti, pariter potum ingestum peristaltica intestinorum agitatione poros parietum trajici credebant, pondere proprio juvante. Causa ergo, cur ex eorum sententia fluida per poros effugiant, vis est mere mechanica, quae quidquid aquae intestinis inest comprimens, in peritonaei cavitatem protrudit. Quam maxime vero ambiguum est, an motus intestinorum peristalticus humores per poros parietum cogere valeat, cum per se ipse debilis sit, atque contentis in alteram intestini nondum contracti partem via vel expeditissima pateat. Neque illustratum est, quomodo, ne restet hydrops ascites, fluida accumulata in vesicam dirigantur; an forte, ut hujus poros penetrrent, proprium pondus sufficiet?

Ab his conjecturis, pristino atque recentiori in medium prolati tempore, aliis humorum per poros transgrediendi modus, quam argutissime experimentis deductus, valde discrepat atque cæteris praecellit quam maxime. Parrot nimirum pater, vir illustrissimus 1), aliam rationem, qua

1) *Ueber den Einfluss der Physik und Chemie auf die Arzneikunde.* pag. 17, 18, 19.

humores ex intestinis ad urinam poros permearent, eamque legibus chemicis atque physicis stabilitam in lucem edidit. Experimenta, quibus eo iunctus est, sequenti modo instituit. Vesicam humectatam, lotio, adhuc calido, impletam, aquae paris temperaturae immersit atque postea horis viginti quatuor praeterlapsis, urinae quantitatem parte decima auctam invenit; eandem aquae vero imminutam, cum vesicam, illà vice versa impletam, lotio imposuerat. In experimento utroque temperiem continuo aequabilem reddere studebat. Quibus experimentis aliud respondet, quod afferam verbotenus mihi liceat: „Man füllt ein kleines Zuckerglas mit Weingeist, bindet es mit feuchter Blase fest zu, so dass die Blase sich sehr stark spanne und versenkt das Glas in ein Gefäß mit gemeinem Wasser. Nach 2—3 Stunden hat das Volum der Flüssigkeit im Glase so stark zugenommen, dass die Blase halb kugelförmig gewaltsam gespannt wird, und macht man mit einer Nähnadel ein Loch darin, so entsteht ein Springbrunnen, der zuweilen 10 Fuß hoch steigt. Kehrt man den Versuch um, füllt nemlich das Glas mit Wasser und setzt das Gefäß in Wein-

geist, so entsteht die entgegengesetzte Wirkung: das Wasser dringt durch die Blase hindurch aus dem Glase und der Druck der Atmosphäre treibt die Blase in eine hohle Halbkugelform.“ Membranae substantia, ex adhaesionis lege succum urinosum vinique spiritum respuens, aquam resorbet neque evadere sinit, nisi quid adest extra situm aut intra, quod vim attractivam chemicam in aquam exhibeat, ita ut, quidquid ductibus vesicae capillaribus ademptum sit, extemplo restituatur ab aqua, ultra membranam versante. Salia aut aliae quaedam substantiae, si quae immixta sunt aquae et affinitate cum eadem intime conjuncta, perinde membranam vesicae penetrant, quod fieri equidem expertus sum, vesicam lotium continentem in kali borussici solutionem immergens atque una hora et dimidia post, ferri muratici ope urinam maxima kali borussici quantitate praegnantem inveniens. Pariter fluida hausta, postquam in intestina super vesicam jacentia pervernerint, in hanc abire, siquidem lotio, quod ex affinitate poros humidis privaret, impleta esset, atque ductus capillares novas ex intestinis substantias sorbere, celeberrimus ille conjectit. Ad

quam sententiam examinandam me accigens; primo medicorum de porositate opiniones sibi stricte oppositas mihi esse disquirendas, solidoque vivo an pori anorganici accensendi sint nec ne, prius explicandum arbitror.

§. 13.

Omnibus vivi corporis membranis poros non vasculosos inesse, quibus aquosae sanguinis partes percolarentur, celeberrimi atque artis medicae peritissimi confirmaverunt. Sic ill. Hunter¹⁾ fluida nonnulla in corpore vivo praesertim illa aquosa, quibus viscerum superficies interna et externa maderet, sola exsudatione mechanica e sanguine secedere statuebat, nam arteria quaelibet, aqua repleta, brevi post humido poros intrante collabetur; sic cel. Mascagni²⁾ „omnium“ inquit, „diversorum humorum separatio a poris anorganicis fit“, quicum cel. Albinus, Meckel, Haller etc. ex-

1) W. Cruikshank's Geschichte und Beschreibung der einsaugenden Gefäße, aus dem Engl., herausgegeben von Ludwig. Leipzig. 1789. pag. 9.

2) Geschichte und Beschreibung der einsaugenden Gefäße, aus dem Latein. von Ludwig. pag. 24

parte consentiunt. — Alii contra aequa de arte medica mèriti, ut cel. Fordyce et Cruikshank¹⁾, omnes solidas vivi corporis partes, nisi vasorum auxilio, omnino impervias seu poris sic dictis anorganicis plane destitutas esse, contendunt, vita autem excedente seu turgore vitali amissio simula eisdem quíendam cohaesionis gradum amittere et perinde ac cetera corpora inanimata, porositatem gaudere. In cadaveribus nimirum partes vesicae felleae vicinas, bilis colore tinctas esse, quod vero minime perspicuum sit in animalis adhuc viventis abdomine, tum odorem nullum intestinorum foetidum, in recens mortuo obvium, in vivo animadverti, porro vesicam urinariam, urethra, aut filo aut morbo constricta, interdum usque ad crepandum extendi, lotio haud exeunte, neque pariter denique, orificiis ventriculi vivi ligatis, ullam fluidi contenti effusionem oriri, argumentorum instar afferunt. Omnia e contrario experimenta, porositatem comprobantia²⁾, cum mortuis hominibus aut necatis animalibus instituta esse monent, at solidum vivum a mortuo valde differre.

1) l. c. pag. 10.

2) v. g. a cel. Mascagni l. c. pag. 21,

§. 14.

Quamvis viri illi supra celebrati poros solidis inesse partibus non vasculosos autumantes, in eo modum excedebant, quod ubicunque per eos fluida ratione mechanica transire statuerent, tamen a ceteris, qui in contrariam partem abirent, poros anorganicos solido vivo injuste omnino denegatos esse opinor. Recte quidem Hewsonius¹⁾ nullam transsudationis aliam causam nisi porositatem respiciens, monuit: „Praeterea si in corpore vivo obtineret transsudatio, haec videtur contraria praecipuo scopo, cui sanguifera vasa sunt destinata, scil. continendi et vehendi fluida, et sequeretur, si solito major liquorum aquosorum copia assumatur, hos non adeo ad renes vel alia corporis emunctoria devectum et sic tamquam redundantes ex corpore eliminatum iri, sed futurum, ut in cellulosam effundantur et hydropem anasarca producant“, quae tamen de sola illa transsudatione mechanica valent. Solidarum partium pori, si adsunt in corpore vivo, facultatem laticis ejusdam transeundi tantummodo sistere videntur,

1) Descript. system. lymphat. pag. 100.

tur, nec vero ea de causa, quod adsunt, humores per eos mechanice transeant re vera oportet. Qui poros non vasculosos in solido vivo respuunt et in mortuo tamen adesse experimentis convictos se profitentur, annon eodem ipsi sibi obloquantur, equidem nescio. Poros, qui in mortuo reapse obvii fiunt, vita excedente subito nasci, neque eadem durante jamjam praeformatos esse haud consentaneum mihi videtur, et vita licet membranis omnibus majorem tensionis gradum impertiat, tamen non eum tribuere pollet, qui penitus tollere possit porositatem. Experimenta atque phaenomena, quibus, ut retuli supra, viri quidam sententiam suam de porositate non assumenda stabililiunt, vim mechanicam fluida in corpore vivo per poros trahicere nou posse, tantum coargunt. At vesica urinaria exsiccata ideoque poris certe pervia, licet vis vel maxima mechanica adhibita sit, aquam per poros transmittere nequit, quod tamen in tenerioribus membranis mortuis, ut in vesica fellea, locum habere haud nego atque ex earum majori laxitate, qua pori ampliores redditur, facillime oritur. Verum enim vero, quod ejusmodi transitum in organismo nec videmus nec

fieri probabile est, ea de causa poros omnino negare non possumus. Si receptaculi cuiusdam parietes atque fluidum contentum adhaesione sic dicta ad se invicem gaudent, pori quidem minimi laticem recipiunt, sed hic qua vi in poros illicitus, eadem etiam impeditur, quominus parietum substantiam relinquens extorsum effundatur, nisi alia vis attractiva accedat. Fingamus vivi corporis membranarum pori eam habere amplitudinem, ut eorum diameter aequiparet aut duplo superet minimum crassitudinem aquae illius, qua v. c. lignum ex eadem emersum obducitur, simulque perpendamus, vim adhaesionis, qua illa ligno cohaereat, tantam esse, ut saxum diffindere queat; tum multum aberit, ut vis quedam mechanica per poros semel impletos aliquid fluidi trajiciat, ut potius parietes prius disrumpat.

§. 15.

Poros itaque solido vivo inesse non vasculo-
sos constare mihi videtur et modo commemoratis
atque perpensis paene animum induxissem, ut
transitum illum, qualem celeb. Parrot in medio
poneret, in organismo revera locum habere crede-

rem, nisi experimentis atque ratiociniis essem convictus, hanc humorum ex intestinis ad vesicam per poros transeundi methodum ad explicanda phaenomena neutiquam suppeditare. Concedens quidem, aliis processibus hanc theoriam posse adaequari, tamen nihilominus hanc ad sistema uropoëticum viam non rejicere non possum. Celeb. Westrumb 1), qui sententiae de porositate in corpore vivo anorganica non statuenda favebat, experimentis, institutis cum animalibus vivis, jam probabile reddidit, fluida per ipsam vesicae membranam non permeare. Ureteribus canum aut cunicularum ambobus, postquam abdominis integumenta resecuerat, ligatis et vulnere sutura fere consolidato, modo tincturam rhei, modo kali borussici solutionem in abdominis cavitatem injectis atque intersectis animalibus substantias has in loco quidem, ureteribus supra ligaturam contento, sed infra eorum ne vestigium quidem reperit. Quae vero experimenta, an injecta vesicae membranam in cayum peritoneale spectantem, reapse

1) De phaenomenis, quae ad vias sic dictas lotii clandestinas demonstrandas referuntur. pag. 22.

contigerint, mihi ansam praebebant dubitandi. Primum vesica lotio adeo extensa non esse potuit, ut sat magnam fluidis injectis praeberet superficiem, nam vivisectione durante urina plerumque excernitur, atque ejusdem in vesica praesentia necessario requiritur, ut illo chemico modo humores eidem immisceantur. Licet cel. Westrumb urinam in vesica invenerit, tamen illa ipsa ex causa perparum ejusdem obvium fieri potuit. Pro secundo experimenta illa ita peracta sunt, ut dubitarem, num ad vesicam quamvis maxime extensam fluida injecta pervenerint, nam efficerem omisit, ut fidem haberemus, eum perscidisse peritoneum, quod ureteribus scilicet ligandis non erat opus, atque minime in peritonaei sed in aliud tantummodo abdominis spatium facta esse potuit injectio. His rebus admonitus experimentum mutandis mutatis reiterare constitui. Porcello, jam unum annum nato, quippe cui urina jam magis erat saturata, quam natu minori, prium urethram ligabam, ut vesica lotio impleatur et extendatur quam maxime. Tum in utraque regione lumbali facta incisione ureteres filo constringebam, dextroque latere per rimam peritonaei

factam kali borussici ʒj in aquae ʒj solutam injeci, siphonis simul cuspidem ad ipsam vesicam dirigens, ut in tuto collocarer, solutionem circumfluere illum vesicae parietem, qui peritonaeo obductus cavo peritoneali respondet. Vulneribus clavis suturā, duabus horis post porcellum carotidum laesione necavi. In harum sanguine, liquore pericardii atque urina, in ureteribus supra ligaturam copiose versante, ferrum muriaticum affundens, kali borassicum deprehendi; in lotio vero, quo vesica maxime extensa apparebat, nihil ejusdem, quovis studio adhibito, detegere potui. Huic quidem experimento idem erat evetus, quem cel. Westrumb in suis jam expertus est, tantum quod equidem certius nunc habeam, fluida per vesicae poros, vivo adhuc corpore, non permanere. Vesicam porci recens mactati, urina adhuc impletam, tepidaeque kali borussici solutioni injectam, transitum mox permittere vidi, ita ut maxime certe referat, utrum membrana sit viva an mortua; etsi ab illo discrimine statuendo abhorreat, quod poris careat altera, altera vero hisdem praedita sit. Sed aliud quoddam inest forsitan vivi corporis membranae, quominus humida

poros transeant, impedimentum. Continuo nempe vita durante arteriae muneri praesunt, quo ductus membranarum capillares, pororum con-nubio orti, latice peculiari, sive mucoso, sive seroso, imbuti reddantur. Licet paululum hujus humoris, in vesicae ut ita dicam parenchymate contenti, affinitatis causa cum urina jungatur, tamen quidquid depromptum est, arteriarum actione perpetua illico restituitur, ita ut alius liquor, vesicam forte circumdans, ex capillaritatis lege poros intrare nequeat, quia jam ex alio fonte, nunquam cessante, implentur. Sed quaeritur adhuc, an non humores vesicam ambeuntes, quamvis capillaritate physica vesicae substantiam penetrare non possint, chemica tamen affinitate succo, ex arteriis exhalato, immisceri cogantur? Cui vero quaestioni respondeam, liquorem mucosum, quo membrana impleta sit, chemico respectu, quam maxime partem agere indifferentem. Sic mucum quendam, quem arteriae perpetuo deponunt, ob-staculum habeo, illam in se invicem substantiarum disparium actionem intercludens, quam qui-dem per membranam vita carentem tam perspicue effici constat. Accedit etiam, ut fluida hausta non

sicut in illis experimentis, immediate vesicae membranam attingant, illa intestini cujusdam intercedente; nec mirum ergo, quod ureteribus ligatis kali borussicum ventriculo injectum in vesicae urina non reperiri, cel. Westrumb 1) exper-tus est.

§. 16.

Propriis viis, quibus ex intestinis ad sistema uropoëticum substantias pervenire, medici suspi-cati sunt, enumeratis simulque, ut debui, refuta-tis, quaestio suboritur, num spes omnino adhuc restet, tales aliquando tamen posse inveniri?

Fons fluidorum, urinam gignentium triplici modo existere potest: aut ductus soli, nondum detecti, aut arteriae tantummodo, aut ambo tra-mites simul humores lotium componentes advehunt. Urinam vero per ductus clandestinos, qua unicam viam, uropoëeos systemati cognito non suppeti, experimenta cel. Krimmer 2), Westrumb 3) atque Richerand 4) evidenter coarguunt. Cel. Krimmer

1) l. c. pag. 23. exp. 7.

2) Physiologische Untersuchungen, 1820. pag. 5.

3) Meckels Archiv. Bd. 7. pag. 527 ff.

4) Richerand, nouveaux éléments de Physiologie, Paris 1820. Tom. I. pag. 281.

nimirum cani, arteriis renalibus ligatis et vesicā ope dīgiti, intestino recto immissi, evacuatā, kali borussici solutionem in ventriculum injecit, atque aquam bibendam praebeuit. Alterō die animali necato, vesicam urinariam vacuam, renes pallidos, eorumque arterias thrombo clausas, in sanguine vero vasorum intestinalium kali borussicum detexit. Quae experimenta eodem eventu et Kriener et Westrumb pluries instituerunt. Cel. Richerand ureteres in fele atque cuniculo ligabat, quibus post aliquos dies mortuis, successum animadvertebat his ab eo descriptum: „la vessie étoit parfaitement vide, les uretères dilatés par l'urine au-dessus de la ligature jusqu'aux reins, égaloint le doigt annulaire en grosseur. Les reins eux-mêmes, penetrés d'urine, en étoient gonflés, ramollis et comme macérés; tous les organes, toutes les humeurs, et le sang lui même, participoient à cette diathèse urineuse.“

At ductus nondum detecti etiam unā cum illa per arterias via adesse possunt, ita quidem, ut urinae renum ope secretio et in vesicā accumulatio causa fiat illorum ductuum functionis; nam per se inversa causalis ratio tollitur.

Tum sola lotii jam effecti praesentia, tali quodam modo, qualem cel. Parrot conjecerit, humorum transitum efficiat necesse est. Cum vero illustrissimi viri illius sententia minus probabilis videatur, quonam altera ratione haec fieri, nobis fingamus? Nonne vanis immergamur hypothesibus?

§. 17.

Nihil itaque esse, equidem autumo, quod vias lotii clandestinas inventum iri speremus. Studeamus potius, phaenomena, quae illam per arterias regiam viam nobis suspectam reddiderint, rite illustrare, ita quidem, ut istis, quae semper occultae mansurae videantur, nobis nou opus sit viis. Quem vero finem priusquam adipiscamur, plurima adhuc, ut totius organismi oeconomia intelligatur, desideranda, multa inquirenda esse, sentio ac scio. Jam gravia quidem et magna illis viris debemus, qui experimentis sedulo et varie institutis, quid adsit, nos docuerint, sed quo fiat, adhuc nos non latere non potest. Periculum itaque faciens illustrandorum phaenomenorum, me quo difficilius sit, quod suscepimus, quoque brevius consumpti temporis spatium, eo magis indulgentiam sperare confiteor.

Sectio III.

§. 18.

Nobis phaenomena priora, §. 5. allata, respiciensibus duo praecipue notatu dignissima momenta sese offerunt: 1) celeritas, qua substantiae ore assumptae in urinam abeunt, 2) ille frigidorum potum usu inter bibendum saepe exoriens impetus ad excrenendam urinam.

§. 19.

Substantiae quaedam multo ocius in lotio deprehenduntur, quam quas a vasis lymphaticis sorptas per glandulas mesaraicas ad ductum lymphaticum et subinde in sanguinem vehi, consentaneum sit. Cel. Home 1) tincturam rhei septemdecim

1) Reile Archiv für die Physiologie, Bd. IX. S. 525.

minutis primis et cel. Krimm 1) jam quindecim praeterlapsis in urina, kali caustico adhibito, iterum invenerunt. Exempla vero quam maxima celeritatis ill. Westrumb in scenam protulit 2). Matutino tempore jejunoque ventre tincturae rhei haustae vestigia prima iam quinque minutis post in lotio, kali caustici solutione adjecta, prodeebantur. Fistula, per quam perpetuo in vitrum suppositum perstillaret urina, cuniculi urethrae immissa, rhei solutionem ventriculo injecit atque eodem tempore post in urinam detexit; — quin etiam duabus horae minutis primis praeterlapsis, kali borussicum invenit, quod, ceteris paribus, cani praebuerat.

Inquisitiones autem physiologicae, venarum vim resorbendi demonstrantes, maximam sane rei lucem afferunt. Experimenta gravissima, quae sententiam jam a veteribus pronunciatam, coarguunt, et extra omnem, ut mihi videtur, dubitationis aleam ponunt, hic paucis mihi commemorem liceat.

1) I. c. pag. 9.

2) Meckels Archiv für Physiol. Bd. VII. S. 538 ff.

1) Una tantum arteria et vena, imo solus sanguis arteriosus et venosus unicum inter corpus et partem quandam ab eo solutam commercium constituebant, nihiloque secius venenum parti illi allatum in ceteras vim suam exhibebat fatalem. 1)

2) Humores per tracheam in pulmones injecti 2—5 horae minutis primis peractis in cordis quidem sinistri sanguine, neque vero in eodem dexteri, nec in lymphâ apparebant. 2)

3) Animalibus diversis, quae substantias aut odore aut colore excellentes, aut salinas simul cum alimentis sumpserant, postea necatis, pigmenta et res illae graviter olentes in venarum mesentericarum, liepis, vastisque portarum sanguine reperta sunt, chylo tamen ductus lymphatici haud alienum odorem coloremve prae se ferente, eti substantiae illae adhuc in intestinis praesto erant. Plurima ingestorum salium in sanguine illo, sed

- 1) Magendie et Delille, Meckels Archiv für Physiologie, Bd. II. S. 252.
2) Mayer, ibid. Bd. III. S. 493. — Westrumb commentatio physiologica cit. pag. 22.

nonnulla in chylo tantummodo chemicis reagentibus detegebantur. 1)

4) Duodenali ventriculi ostio in canibus ligato, nunc rheum, nunc kali borussicum in eundem injectum, postquam cardia etiam filo clausa erat, in arteriae cruralis sanguine decem minutis horae primis praeterlapsis inveniebantur, sed cum venae ventriculi omnes, ceteris paribus, erant constrictae, omnino deerant. 2)

5) Ductu thoracico magno filo constricto, tintura rhei, salia etc. ventriculo immittebantur, atque necatis animalibus, eti unicus aderat ductus, tamen in sanguine venarum apparebant, lymphâ iisdem carente. 3)

His experimentis confisos haud temere autores concludisse opinor, ex intestinis venarum fun-

1) Tiedemann et Gmelin, l. c. pag. 6 ss. — Westrumb's Versuche über den directen Uebergang verschiedener Substanzen in den Kreislauf des Blutes, im 7. Bande des Meckelschen Archivs, S. 540.

2) Krimer l. c. pag. 14.

3) Home, Reils Archiv, Bd. XII. S. 125. — Mayer, Meckels Archiv, Bd. III. S. 496. — Westrumb, Dasselbe Archiv, Bd. VII. S. 549.

ctione sorptas celeriter per sanguinis circulationem substantias ad renes deferri, quibus e corpore eliminantur. Celeritas enim, qua in lotio apparet, sane eam non superat, qua sanguinis peregatur circuitus. Ponamus calculos. Omnis sanguinis moles duabus et triginta libris seu uncii trecentis octoginta et quatuor in adulto homine circiter constat, atque systole cordis unquamque sesquiunciam propellente, pulsibus ducentis quinquaginta et sex quodque cordis ventriculum transeat necesse est, ita ut sanguinis totius circulationem, si cor septuaginta quinque vicibus in quaque sexagesima horae parte micat, tribus cum dimidio horae primis minutis absolvi opereat. Nihil enim refert circuitum duobus fieri modis, nam quo tempore sesquiuncia ventriculum dextrum relinquit, eadem copia intrat sinistrum, qua de causa ventriculi ambo hoc respectu pro uno habendi. Librae duo et triginta, quae tribus cum dimidio primis minutis e corde sinistro aortam intrant, jam et minorem et majorem circulationem peregrisse debent, nam alioquin illa sanguinis quantitas hoc tempore non potuisset transire. Examinemus nunc viam, qua substantiae ex

ventriculo in renes velantur. Venarum intestinalium sanguini immixtae ad venam cayam adscendentem allatae cum descendantis sanguine venaeque cordis Galeni confusae per circuitum minorem, aortam, arteriasque emulgentes in renes feruntur; — via sane expeditissima!

Nihil itaque est, quod amplius miremur, cel. Westrumb quinque, imo duobus horae minutis primis peractis rheum et kali borussicum in lotio deprehendisse. Ceterum experimenta illam confirmant sententiam. Cel. Mayer in experimento sub No. 2 citato pulmonibus injectas substantias, quinque minutis post in cordis sanguine repertas, octo minutis horae primis peractis in urina detexit. Cel. Westrumb 1) kali hydranthracazothionicum, septem primis horae minutis antea cani injectum jam in sanguine vasorum cordis majorum reperit. Cel. Krimer 2), in duorum cuniculorum lotio, quindecimi primis horae minutis post, rheum et kali borussicum in ventriculum immissum percipiens, in arteriae cruralis sanguine rheum jam quinque

1) Meckels Archiv. Bd. VII. S. 541,

2) l. c. pag. 10.

et utrumque decem primis minutis praeterlapsis invenit. — Cel. Wollaston quidem sanguinem venae brachialis nequidquam investigabat, sed duabus demum horis postquam kali borussicum erat sumptum, quo tempore scilicet idem per renes jamjam semotum esse probabile videtur, cum tanta in eos sanguinis moles quoque momento irruat. Accedit etiam, quod auctore cel. Magendie 1) kali borussici copia vel minima in lotio quidem, neque vero perinde inveniatur in sanguine, quae ea de causa D. Eichhorn 2) oriri praecepit, quod kali borussicum arcte sese crux adjungeret, quae conjunctio vero non nisi ope acidi nitrici sejungeretur. Sic etiam cel. Darwin nitri in sanguine inveniendi methodus fallacissima erat, nam charta sanguini immersa et subinde igni admota nulla cum detonatione comburebatur, quod vero, etsi sanguini paululum nitri admisceas, tamen non fieri, experimentis jam constat 3). Praesentiae clandestinarum viarum argu-

1) Meckels Archiv. Bd. III. S. 373.

2) Westrumb commentatio physiol. cit. pag. 24.

3) ibid. pag. 36.

menta, quae D. Morichini, ut supra monui, attulit, quod acida in urinam transeuntia cum natro libero sanguinis connubium inirent, si per arterias renales adveharentur, parvi putanda sunt, nam elementa acidorum urinae peculiarium sane arctissime sanguini inhaerentia, tamen detrahuntur rerum functione.

Tres praeципue existant apparatus in corpore, qui res nocivas, alias alias, e sanguine amovere co-nantur, sistema nempe cutaneum externum, pulmones et renes. Organa illa respirationis volatilia, fixa renes prae ceteris ablegare videntur. Si ad renes imprimis haec substantiae ductuum peculiarium ope ferantur, qua ratione ad cutem et pulmones illae perveniant, nisi arteriarum auxilio? Nonne eo ipso, quod organon suas quodque res e corpore eliminat, ista cel. Trevirani sententia, per telam cellulosam haec fieri, refellitur, licet membranae solidae (quod equidem negem) fluidis transitum permittant? Illa vero, qua praecipue ejus nititur opinio, celeberrimi Home observatio, quae rheum sumptum nonnullis horis post e lotio evanescere atque digestione absoluta in eodem iterum apparere docuit, alio modo illustranda esse

videtur. Experimentis, venarum vim resorbendi confirmantibus, simul exploratum habemus, res heterogeneas, nutriendo non aptas a venis, a vasis lacteis vero jamjam in chylum subactas aut magis corpori homogeneas suscipi. Rheum in illis experimentis, simul ac in ventriculum erat pervenatum, qua corpori heterogeneous, a venarum surculis avidissime sorptum, renibus semovendum trahebatur. Cum vero, diutius in intestinis versatum, peculiari eorum chemicae actioni, quae omnia subigere molitur, exponeretur, magis magisque idoneum, ut a lacteis recipere, redditum est. Ita simul est factum, ut venarum resorptione cessante in lotio rheum aliquamdiu evanesceret, donec altera ejusdem magis assimilata pars ope ductum lymphaticorum sanguini imperita ad renes advehebatur.

Potu largiter assumpto copia lotii, fluida superflua sanguini immixta evacuantis, augeri eoque major fieri debet, quo efficacior potulentis vis inest rerum functionis stimulandae, quoque renes stimulo capiundo magis idonei sunt. Huc illi pertinent casus, quales cel. Haller observavit, ubi in tanta quantitate urina excreta fuit.

§. 20.

Altera est quaestio, qui fiat, ut saepc potus frigidos sumentes inter potandum de urinac excretione moneamur. De hac re jam cel. Hallerⁱ): „Sed neque verum est“, inquit, „quod de subita mictione aquae dicitur. Dudum Bohnius annotavit, deinde Herrm. Boerhave non esse eam urinam, quae ita subito mingitur, hanc ipsam, quae nuper epota est, aquam, esse vero urinam coloratam, foetidam, quac dudum in vesica fuit.“

Nisus urinae expellendae actione nervorum intercedente efficitur, ita ut eorum ope, etsi nobis insciis, ea cerebri affectio producatur, cuius reactio fibras vesicae musculares contrahere valeat, ex qua nimirum contractione ille excernendi exoritur impetus. Nunc multo alia nervorum incitamenta, ac lotium tautum accumulatum, illam cerebri affectionem gignere queunt, quam contractio vesicae excipit, ut saepissime in morbis vide- re licet, ubi vesica quidem omnino inani, tamen vel ardentissimum ejusdem evacuandae studium adest. Nonne frigus potulentorum parem in nervos exhibere possit efficaciam? Posse opinor,

ⁱ) Elementa physiologica. Tom. VII. pag. 278.

nam frigore in ventriculo evanescente pariter illud ad mejendum conamen disparet.

§. 21.

Qui vias clandestinas urinarias defendere co-nantur, porro afferunt, ureteribus ligatis, ut cel. Kratzenstein observaret, lotium tamen in vesica esse repertum. Etsi autores et veteres et recentiores aequa ac vir ille celeb. ureteres ligaverant, tam en iisdem eventum parem animadvertere non successit; vesica potius semper erat vacua et supra ligaturam ureteres tumidos sese manifestarunt. Quod vero cel. Kratzenstein in vesica tamen urinam deprehendebat, vario modo exortum esse potuit: aut in alterutro latere illis animalibus duo erant ureteres, quorum alter ligatura vacabat; aut vesica jam ante ligationem lotio erat impleta; aut filum minus arcte ureterem constringens urinam non omni ex parte retinebat, ut paullulum ejusdem persillaret; aut arteriae laticem deponebant serosum, qui pro lotio habitus est. Quae cel. Thilow de carente ureterum cum renibus con-nexu in seie, quae alii de renibus suppuratis, aut scirrhosis, aut nullis salva tamen lotii se- et ex-

cretione contendunt, sane vias lotii peculiares adesse confirmare videntur. Si vero exactius de-cursum et exitum morborum illorum examinamus, nos minime fugiet, se- et excretionem urinae neutiquam salvam, sed potius vel maxime disturbata appellandam fuisse, nam in casnum quoque aut vomitus aderat urinosus, aut alvi dejectiones aut sudores urinam redolebant, ita ut renum minima saltem pars secretioni urinae adhuc praecesset, quac resorpta aequa ac in cute membra-naque intestinorum mucosa, ab arteriis in vesicae cavitate deposita et subinde normaliter excreta esse potuit. Si observatio illa, quod renes non nunquam utique deissent, vera dignaque est, ex qua colligamus rationes, tum potius sequeretur, secretionem non esse adstrictam organo peculiari-ter formato, sed quodvis aliud, quamquam ab illo structurâ vel maxime differat, substantias urinæ proprias e sanguine fingere posse.

§. 22.

Denique corpora solida in vesica reperta aut una cum lotio excreta esse, — id, quod minime ad vias lotii peculiares probandas valet, — non

nulli qua argumentum præsentiae illarum profertur. Jam multa existant exempla, quibus corpora solida ex alia parte in aliam sensim sensimque migrare, sibique miras, easque pathologicas sternere vias, edocti sumus. Usitatissima hujus rei explicatio permeabilitati telae cellulosa, omnia organa usque ad fibram eorum minimam circumfundentis, deprompta est. Fibrae tamen membranarum, quas tela cellulosa intertextas solidâ perforant, aliae alia sensibilitate gaudent, ideoque modo mere mechanico, pressione scilicet telam fibrâs interjectam dilatando, corpora illa permeare nequeunt. Solida forte deglutita atque loco intestinorum cuidam obhaerescens, jam ea de causa quod adsunt, inflammationem etsi minimam cieant oportet, quam aut suppuratione aut membranae sequitur resorptio, ita ut corpora illa intestinoexeant. Postea vero cum in telam cellulosa laxam organa majora ab invicem separantem delata sunt, eo magis illa valet rei expositio mechnica, quo minori cellulosa per se praedita est sensibilitate; at vesicam aut ureteres transituris ille modus transgrediendi, ut ita dicam, vitalis denuo viam aperit. — Ceterum si corpora illa viis istis loti peculiaribus ex intestinis ad vesicam devecta essent, tum et viti, anatome diligentissime vacantes, certe istas invenissent, et alia sane omnino perciperentur phænomena.